

Disc Makers ta nombra Arubiano Tony van Veen como Presidente di e compania

ORANJESTAD - Disc Makers, e fabricante mas grandi di CD y DVD pa artistanan independiente na Merca, a nombra e Arubiano Tony van Veen como Presidente di e compania. van Veen, 42, a crece na Aruba y a atende Colegio Arubano, unda el a gradua na aña 1983. El a ricibi un beca di Exxon (Lago) y a atende e prestigioso Wharton School of Business di University of Pennsylvania na Philadelphia.

Na 1987 Tony a cuminsa su carera profesional como sales and marketing associate na Disc Makers, basa na Philadelphia. Tony ta e prome person fuera di e famia Ballen, kendenan a funda e compania, pa dirigi Disc Makers den su 61 aña di existencia. Tony ta reemplaza Morris Ballen kende a maneha e compania desde aña 1972.

Tony van Veen ta conoci den e industria di CD y DVD Americano como un di e lidernan mas inovativo di e industria. Bou di su maneho como Vice Presidente pa e ultimo 20 añanan e compania a expande di un fabricante chikito di disco cu bentanan di US \$5 milyon pa aña pa un compania internacional cu 480 empleado, 8 oficina na Merca i den Caribe, cu benta di US \$80 milyon na 2006.

“Mi ta hopi orguyoso di e exito cu Disc Makers a experiencia,” Tony a bisa. “Nos ta focus riba cada cliente pa duna nan un calidad di producto sin igual y servicio di clase mundial. Y mi ta extra contento ora nos tin e oportunidad di traha cu clientenan Arubiano”.

Algun di e artistanan y studionan di grabacion mas renombra na Aruba ta cliente di Disc Makers. Pa

casi dos decada nombrenan familiar como Claudius Philips, Las Originales, Watapana Recording Studio, Ivan Quandus (IQ Studio), Padu del Caribe, y hopi mas ta clientenan di Disc Makers.

Tony su amor pa musica a cuminsa como hoben na Aruba. Como mucha el a atende Arubaanse Muziekschool bou direccion di director Efrain Coutinho. Na fin di añanan 70 el a toca saxofon den e famoso brassband di Rufo Odor. Ora Tony van Veen a cuminsa su carera universitario el a toca drum den algun grupo di rock, cu cual el a saca un album y bai di gira na Merca. Na 1987, despues di su graduacion di Wharton School, Tony a cuminsa su carera na Disc Makers.

Tony van Veen ta yiu di Sheila Lampe y nieto di W.F.M. (Wim) Lampe, un di e prome notarionan na Aruba, y Ministro Plenipotenciario pa Antiyanan Hulandes na Hulanda den añanan 60. Tempo cu el a cuminsa traha cu Disc Makers, Tony tabata e prome persona pa tuma tur e

canticanan y grabacionnan di Padu Lampe y haci nan digital. E ta continua di tin lazonan hopi fuerte na Aruba. “Aunque mi tin mas cu 20 aña ta biba afo, Aruba ta keda un gran parti di mi identidad,” van Veen a comenta. “Mi ta masha agradecido pa e hubentud alegre cu m’a pasa na Aruba. E sistema



escolar a prepara mi hopi bon pa e estudio riguroso, y den mi carera e tabata un bentaha hopi grandi di por papia varios idioma.” Tony van Veen, su casa Farina, tambe Arubiano, y nan dos yiunan regularmente ta biaha pa Aruba pa bishita famia y amigonan, y pa goza di e cultura, musica, y beachnan famoso y bunita di Aruba.